

地理

九折七盤重關疊戶雖彈丸邑實屏畿輔地晉華腴人
安瘠苦敦厚尙儒慨焉懷古志地里

建置

阜平本禹貢冀州域于周爲并州地春秋時爲奚子國地
於戰國爲東垣地秦罷侯置守置南行唐縣於秦爲南行
唐地屬鉅鹿郡西漢屬常山郡南行唐地東漢爲中山國
地魏晉因之元魏時爲常山郡行唐地北齊後周皆行唐
地唐爲鎮州行唐地宋遼時改行唐西北境爲行唐北砦
金初改北鎮章宗明昌四年始置阜平縣隸正定府元屬

正定路明仍改路爲府阜平屬焉境以內分十社我

朝順治十六年以高鼎之亂廢縣析東五社屬曲陽西五社屬行唐康熙二十二年

聖祖仁皇帝巡幸五台允士民之請復設縣時舊城圯官吏舍於王快鎮乾隆十年奉檄還舊地卽今治也

論曰阜平地數百里居民厯落如晨星計其戶籍僅足當名都一大聚落耳雖不縣可也然而縣廢二十餘年士民請復之

朝廷亦竟許之何哉蓋以山谷阻深閭閻貧瘠貧瘠則疾苦難周阻深則奸宄易匿非置縣於此無以恤民隱而折

姦萌則思所以置縣之意而吏治之所宜先卽寓於是
矣而聚族而居於斯者亦尙遠追乎陝隘勤儉之風勤
求乎文武讓廉之義共砥行礪學蔚爲人望使著面之
黑子爭盛於孝讓之國冠蓋之鄉焉斯於前此殷殷請
復之意爲不負矣

疆域 關隘附

郡縣之設畫疆而理戶口之登耗田野之芾易盜賊之有無關津之通塞咸於是焉稽之故置縣必明其疆域者正經界重職守也抑又聞守國不如守關守關不如守隘故有一夫當關萬夫莫開之謠因志疆域而以關隘附焉

阜平屬正定府縣治在府治西北二百十里東抵曲陽縣界六十里縣治百二十里西抵山西五臺縣界九十里縣治二百七十里南抵靈壽縣界九十里縣治百五十里北抵山西靈邱縣界九十五里縣治二百一十里東南抵行唐縣界七十里縣治百四十里西北抵山西繁峙縣界百

六十里縣治二百七十里東西廣一百五十里南北袤一百八十五里幅幘遼濶道路艱險東北臨大茂曰嶽曰鎮望祀之所宗也西望五台北通宣大屹然爲燕晉門戶南接中山綺交牙錯形勢所互相首尾也重巒沓嶂萬峭鑿天畿輔西南鎖鑰實在於此而其關隘最要者有二曰龍泉曰茨溝

龍泉關去縣西七十里上下二關斷崖峭壁棧道盤紆西北接山西界各數百里所屬隘口皆與晉省分列防戍前明於茨溝設參將控制三關

國朝移駐龍泉後改遊擊復改都司兼轄汛口十餘所

茨溝營在龍泉關東北一百里距縣治一百二十里舊曰
茨溝村西北與靈邱繁峙接壤岡巒縈抱爲燕南鈴鐸前
明設參將於此

國朝改設守備復改千總又改把總屬龍泉兼轄詳見兵防
志

論曰易稱地險山川邱陵若龍泉茨溝可謂險哉然由
國朝以視前明抑何安危之相去懸絕也康熙二十二年

聖祖巡幸五臺再駐驛龍泉關

御製五言近體詩一章乾隆十一年十五年

高宗兩過關東三箭山

御製七言近體詩各一章關山滿目

聖人惟是來游來豫矢音卷阿蓋天下之平久矣後之覽者弔
勝朝之故墟仰

列聖之遺蹟其亦思飲和食德有所自來而穆然於守國之長
策固有不金湯而永固者哉

城池

阜平縣城其創造規模無可攷府志言前明成化五年重修

國朝順治十六年縣廢城圯乾隆十年署縣事羅如璋奉檄重修高三丈厚一丈周二里西南建二門南和薰門西順成門北倚派山南臨派水東注北溝天設奇險不假修鑿乾隆二十二年霖雨兼旬西南北共圯八十八丈知縣鄒尙易董十社民人節分修葺於二十九年三月屬役賦丈越二月而歲事邑人因請城垣分屬十社後有剝壞責所屬修補嘉慶十六年值

睿皇帝西巡縣令錢鴻誥督役起阨崩新樓堞繼此遂無大功役
矣攷城池始於伯鯨後世遵用之蓋守禦之具所謂慮患
未萌者誠不可疏也然必過爲險峻甚至秦稱漆城蕩蕩
赫連蒸土爲城試刀劍可入輒殺役者果何益哉傳言民
保於城城保於德盡之矣

官署 街坊館舍附

令長奉

天子法宰治百里施政令讞獄訟徵發期會用敷宣

朝廷威德悉於官署焉出之而乃聽其頽侈穿敞至如貧士之囊牖繩樞上漏下涇政之體顧宜爾哉夫事值萬不可已之時而又處地瘠民艱無可措手之勢則仰視屋梁曰此如傳舍閱人多矣於是自幸其不久居而苟且之心生夫苟且於己未有不苟且於人者也苟且於署未有不苟且於官者也阜平官署在城內正北隅舊志言明洪武三年知縣何仲禮建天順四年知縣趙忠重修

國朝順治十六年縣廢署亦圯康熙二十二年復縣文武員弁假寓王快鎮乾隆十年奉文還舊治十三年知縣羅仰鑣因舊基重建前爲儀門鼓樓監獄在儀門之右中爲大堂大堂前左爲吏戶禮倉房右爲兵刑工房後爲門房阜房又其後爲中堂左右房舍俱備二十七年霖雨連縣大堂左右科房俱塌知縣鄒尙易重加葺治增建書屋數間於中堂之右土地祠三間於儀門之左糜銀二百兩有奇一出俸餘不以累民舊志所載如此而見於圖者中堂之北有後堂三間後堂西有退思軒其北爲內宅嗣是修葺存案者六皆無所增易同治三年知縣徐霖於退思軒西

偏建鴻泥軒二間十年知縣勞輔芝蒞任上下周視則儀門以內均多坍塌穿漏規模僅存而且院無牆客無廳治文書無所廚無屋以席爲棚荒草頽垣淒涼滿目獄無立壁刑徒寄他縣慨然念及今不修治則署將廢矣因於中堂則苴罅漏飾黜堊舊有額曰彊恕字已漫漶遂新之改題爲敬事堂堂之西建軒兩楹爲理文案之地大堂東門房之東建廚屋三間茶室一間雜役住室五間鄒令所增書屋已壞不可支改建客廳三間額曰居易又於後堂西下建書屋三間處賓朋鴻泥軒之南續土室一間栖僕從繚以周墉度高一丈又重築獄牆加棘焉其他補葺整治

多不具書至所費項亦數百金皆兩年中設法籌款出廉
俸漸次營構也然於鼓樓儀門則力已屈不能不待於後
矣伏思輔之以菲材承乏未能起瘠煦寒懋著循績雍雍
焉琴於堂簾於室豈敢懷安夸靡崇飾居處爲觀美哉第
仰思前賢創造之艱顧慮後此敝壞愈多則糜費愈鉅爰
因舊增新略備規制更冀後之君子於已成者防護之未
完者振興之使出政之地不至荒涼零落以共免苟且之
咎焉或亦所以重官守而尊

國體歟

典史署在監獄之右

學官署在城西北隅 學宮西同治八年教諭張大壯重修

把總署在城東隅 關帝廟西

都司署在龍泉關

縣署前東街有坊曰彰善乾隆二十五年知縣鄒尙易建
小東關有拔萃坊乾隆五十八年知縣張極建俱歲久剝
蝕同治十二年知縣勞輔芝一律重修南關亦有舊坊額
曰畿輔西障乾隆二十五年建

縣之假治王快也有署在東街自移舊治署日圯乾隆二
十三年知縣鄒尙易以王快當幅奏之衝各憲巡行下邑

必停驂於此因鬻公產修葺不足飲以俸東西增建廊廡
各三間民間所謂大公館者也五十八年知縣張極改爲
育才書院縣治之東舊有察院署久廢鄒令又以邑西聖
水庵當龍泉關孔道嘗於此置舍三間爲往來居停之所
亦久廢矣

按舊志有館舍皆鄒令所創建故鄭重言之今或改或
廢蕩然無復存矣而猶附見於此者蓋鄒公不忘賓旅
之心不可遂泯云爾